

Transkription von Testament HST 1386b

Ort, Datierung: Stralsund, 1386-09-05

Signatur: Stadtarchiv Hansestadt Stralsund, Test 1, Nr. 0414 und 415 [\[online\]](#)

Inhalt: Gherlich Badyseren: Testament

Bemerkung: zwei zusammengehörige Testamente

Jn godes namen amen . Jck Gherlich badys(er)en en Ratman tome Sunde . met wolberadene möde vnde met wolmacht / mynes sunden liues myner danken vnde myner redelcheyd god de sy ghebendyt Eft syk my(n) leuent wandelt in dat ewe/ghe leuent So sette yk vnde make my(n) testament in alsusdaner wys . To dem ersten male so bevele yk myne sele deme / almechteghen gode . Item so gheue yk sunthe Nicolawese . xx . m(a)rk . vnde keze dar sulues myne bigraft . Ite(m) den armen / kranken luden to sunthe Juryan y(m)me nygen hus . vj . m(a)rk . eneme yewelken syn del in syn hant to dunde . dar gheue yk / em tũ twelf bade . to ysleken bade . j . tu(n)ne beres . Jtem gheue yk deme godeshuse dar sulues . iij . m(a)rk to den buwe . Item / gheue yk den grawen brod(er)en . vj . m(a)rk . malk syn del in syn hant to dunde . Jtem sunthe Jacoppe . x . m(a)rk to den buwe . / Jtem gheue yk den armen kranken luden de in den bedden ligghen tome hilghen gheste . vj . m(a)rk . malk syn del in syn / hant to dunde . vnde gheue deme Godeshuse dar sulues . iij . m(a)rk to deme buwe . Jtem gheue yk sunthe Ghertruden . ij . / m(a)rk to den buwe . Jtem gheue yk vser leuen vruwen . xx . m(a)rk . to eren buwe . Jtem den swarten brod(er)en . vj . m(a)r(k) / malk syn del in syn hant to dunde . Jtem to sunte marien magdalenen . iij . m(a)rk to den buwe . Jtem gheue yk den arme(n) / luden to Ra[m]byn . v . m(a)rk . malk syn del in syn hant to dunde . Jtem den armen luden to Grystow . v . m(a)rk . malk syn / del in syn hant to dunde . Jtem den armen luden to Pantelisse . v . m(a)rk . malk syn del in syn hant to dunde . Jtem den / armen luden to Starkow . v . m(a)rk . malk syn del in syn hant to dunde . Jtem den armen luden tome Rychenberghe . v . / m(a)rk . malk syn del in syn hant to dunde . Jtem gheue yk ysleken armen menschen . j . m(a)rk . de to der weken in myme / huse pleghen to eten . Jtem gheue yk twelf lakene graw vnde wytte . vnde hundert par schũ . arme kranke nottorfte / ghe lude dar mede to kledende vnde to schũygende in de ere godes . Jtem gheue ik de Cappelanen to sunte nicolawese malk / . j . m(a)rk . Jte(m) gheue yk mester Jacoppe van der beke de scolemest(er) ys to sunte Jacoppe . x . m(a)rk . Jte(m) her Jacob rybbenissen . iij . / m(a)rk . Jtem her Thobyas . iij . m(a)rk . Jtem gheue yk den yk den brod(er)en to anclem . v . m(a)rk to eren buwe . Jtem gheue yk den / kalandes brod(er)en . vj . m(a)rk . Jtem der Scolre broderschap to sunte nicolawese . vj . m(a)rk . Jtem gheue yk to der kerken to / Sassendorpe in westualen . xxv . gulden to dem buwe Jtem gheue yk Tesseken myme knechte . xx . m(a)rk . vor synen truwe(n) / dynst . Jtem gheue yk Gherlich muszenere de met my is veftich m(a)rk isset dat he leuendich blyft . Jtem so gheue ik quyd / Gherlich musinghe wes he van myner weghene heft . Dar gheue yk em tũ veftych m(a)rk . Jtem gheue yk quyd Arnd bo/kenhouwer syne wedd(er)legghinge de jk met em hebbe . vnde gheue em dar to druttich m(a)rk . Jtem gheue yk Cũrd hemeken / . xx . m(a)rk Jtem so gheue yk Greteken myme leuen wyue virteyn hundert m(a)rk . isset dat ze syk vor andert . vn(de) alle / smyde vnde alle inghedome half . vnde wes ze heft van kled(er)en vnde van smyde to erme liue dat schal ze to voren vt / nemen . Dar mede so schal ze gantz nũgaftych wesen . Vnde allent des hir bouen blyft van alle myme gude dat sy weghe/lyk edder vnweghelik luttyk efte vele . kleyne efte grot . yd sy waret an sy in ligghender grũnd jn standen Eruen Jn reden /

penni(n)ghen in schult vnde invnschult dat gheue yk altomale mynen kynd(er)en . vnde alle de wyle
dat syk my(n) wyf nicht / en vorandert So scal ze bliuen y(m)me huse met eren kind(er)en dar en schal
ze nymant vt driuen . Vnde wanner se syk vor/andert . Dar negest so scolen myne vormu(n)d(er)e dūn
myner kinder beste met deme huse vnde met alle myme ghude dat yk / na late . Desses testamentes bin
jk nūgaftich also langhe wente yk dat mu(n)tleken wedderspreke . Hir keze yk tū tho /
vormu(n)d(er)en erbar lude alse her hinrike van vnna . her hinryk badyse(r)n ratman tome sunde Eler
badyse(r)n ¹ Hermenhosanghe Brant / ronnegaruen . Hanse van der mole . Hinricke van der lippe .
Cūrd musinghe vnde Ricwine van houele . vnde bidde se / dorch god vnde dorch myner sele willen dat
se dyt testament also vor vullen vnde vorstan so yk en alles ghudes to truwe vnde gheloue . Ghegheuen
tome sunde na godes bort . m . ccc . Jn deme . lxxxvj . yare . Des myddewekens vor vnser leuen /
vruwen daghe der lesten so ze gheboren wart alse men scriuet natuutas marie

¹ *Eler badyse(r)n* nachträglich übergeschrieben